

Chiiruajatkat Karaloukta nütüma Pablo

nümüin

TIMOTEO

1 ¹Taya, wane chi Aluwataaushikai nütüma Jesucristo, Pablokai anülia, aneekuushi taya nütüma chi Maleiwakai. Nücheküin taya süpüleerua nuluwatawaa sünnain aküjaa sümüin wayuu süchiki ee'iranajawaa aa'in nünainjee Jesucristo, tü nüküjakat achiki paala sünnain pansaain nünüiki. ²Ashajüshi taya joolu'u pümüin Timoteo, pia tachonkai aishikai tapüla, pia tachonkai sünnainjee pünoujain nünain Cristo chi taküjapü'tikai achiki pümüin. Achuntüshi waneepia taya nümüin chi Washikai Maleiwa je nümüin chi Wasenyotsekai Jesucristo süpüla namüliajünjachin pia je süpüla nee'iyatüinjanain na'anasia pümüin je süpüla naapüinjanain wane anaa pümüin.

Nukuaippainjatkat Timoteo su'upala wayuu

³Timoteo, achuntüshi taya nümüin chi Maleiwakai paa'u waneepia sa'wai je so'uka'i sünnain taapüin analu'ut nümüin. Nia ta'yataaka amüin, maa aka naa'in na tatuushinuukana, sümaa tatüjaain saa'u tü taa'inrakat

sünnain anasiin nu'upala. ⁴Saa'u sotiin taa'in tü pu'wüirakat wanaa sümaa tapütaain paala püpüla, kee'ireesü joolu'u taa'in te'reein pia püchikua süpüla talatüinjatüin taa'in pümaa. ⁵Shia sotoka ma'i taa'in sünnain lotüin ma'i tü pünoulakat. Ayatsü sukuaiippa tü poushikat pütüma sünnain anoujaa, tü kanüliakat Loida münüin. Maja'a aka sukuaiippa tü püikat Eunice sünnain anoujaa. Tatüjaa aa'ut sünnain müin aka pia naa'in nayakana sünnain anoujaa. ⁶Je sükajee tüü, taso'irüin joolu'u paa'in süpüla paa'inmajünjatüin tü atüjaa aapünakat paala pümüin nütüma chi Naa'inkai Maleiwa wanaa sümaa te'itaain tajapü paa'u. ⁷Je chi Naa'inkai Maleiwa, nnojoishi aapuushin wamüin süpüla weimolojoojanain seema wayuu, alu'ujasa süpüla katsünjatüin waa'in je süpüla aijraainjanain wapüla je süpüla laülaainjatüin waa'in.

⁸Je sükajee eein chi Naa'inkai Maleiwa pümaa, nnojo japülin pia süka aküjaa sümüin wayuu süchiki pünoula nünain chi Wasenyotsekai. Je nnojo japülin pia taka saa'u püreesain taya sulu'u tü kaatsetkat. Shia anaka alu'u müleka katsünre

paa'in nütüma süpüla puuntuinjatüün pülatirüün müliiaa maa aka müliain taya saaliijee aküjaa nüchiki chi O'tte'erüikai. ⁹Nnojo motüin paa'in süna'in nu'tte'erüin waya Maleiwa je süna'in neenaküin waya süpüla wakatalaainjanain suulia kaainjalaa. Nnojotsü naa'inrüin tia süna'injee tü kasa anasü waa'inrakat, shia süna'injee naa'inrüin tü kasa naa'inrüinjattüjütkaalia paala sümaiwa je süna'injee anamiain nia wamüin. Nnojolüüwa'aya kasain eein yaa soo'opünaa tü mmakat, nütüjaatüjülia aa'u chi Maleiwakai süna'in anamiainjachin nia wamüin nükajee Jesucristo. ¹⁰Je müsia maa'ulu yaa, eweetüshi Jesucristo chi O'tte'erakai waya, süpüla nüyamülüinjatüün süpülain tü ouktaakat. Sükajee tia, sütüjaa aa'ulu wayuu süna'in anamiaichipain nia wamüin. Je sütüma tü nüchikikat chi O'tte'erüikai, wayaawatüitpa aa'u süna'in wountüin joolu'u waa'inrüin tü nüchekakat Maleiwa wapüleerua je süna'in eejeenain waya nümaa mapeena süpüla ka'ikat süpüshua.

¹¹Taya Aluwataaushika nütüma süpüla taküjainjatüün nüchiki chi O'tte'erüikai sümüin wayuu je süpüla tekirajüinjainain naya süna'in, ¹²tü anuu te'rüin anainjee müliiaa joolu'u. Otta mayaainje müliain taya yaa sulu'u tü kaatsetkat, nnojoiishi taya japülin, süka te'raajüin Jesucristo chi te'itaakai anain taa'in. Tatüjaa aa'uchi nia süna'in nainküin naa'inmajüin tü taa'inrakat nümüin suulia amülajüin ne'e shia. Naa'inmajüin shia süpüla tü ka'i wasouktüinjatkat o'u nümüin saa'u tü kasa waa'inrapü'ükat kataiwa'aya wo'u.

¹³Pütüjaa'itpa aa'u sukuaippa tü kasa anasü pikirajüinjatkat anain, süka paapüitpain süpüshua tü pütchi

shiiümüin tekirajakat anain tayakai. Je pütüjaa'ichipa aa'u taya süna'in taikkale'erüin taa'in süna'in anoujaa je süna'in alin tapüla tawalayuu sükajee sa'aniraa'itpain takuaippa nümaa Jesucristo. Anakaja joolu'u müleka puushikajaale süchiirua takuaippa. ¹⁴Anakaja müleka paa'inmajüle tü pütchi shiiümüin aapünakat pümüin suulia amülajüin ne'e shia. Chi akaaliijakai waya süna'in waa'inmajüin tia pütchikat, nia chi Naa'inkai Maleiwa süka eein nia sulu'u waa'in.

¹⁵Pütüjaa aa'uchi taya süna'in tayüülajünüichipain joolu'u sütüma wainma tü anoujasükalüirua chaje'ewatkat sulu'ujee tü mmakat Asia eekai eepü'üin tamaa yaaya sulu'u tü pueulokat Roma. Ja'itakaje'e na tawalayuukana Figelo oo'ulaka Hermógenes, nayüülajüin taya. ¹⁶Niaja'a ne'e Onesíforo nümüiwa nnojoiika ayüülajüin taya. Kasataalejese nümüliajüin Maleiwa nia sümaa tü nüpüshikalüirua saa'u tia. Kamaneeshi nia tamüin mayaainje püreesain taya. ¹⁷Antüshi nia yaa Romamüin süna'in nüchajaa'in ma'i tachiki süpüla naa'inmajüinjachin taya. ¹⁸Maa aka pütüjaa'in saa'u, wainma tü kasa anasü naa'inrapü'ükat paala tamüin cha'aya Éfeso. Achuntüshi taya nümüin chi Maleiwakai naa'u süpüla nümüliajüinjachin nia so'uweena tü ka'i wasouktüinjatkat o'u nümüin Maleiwa saa'u tü kasa waa'inrapü'ükat kataiwa'aya wo'u.

2 ¹Tachee, saa'u anamiaichipain pümüin Jesucristo, anakaja müleka katchinre paa'in waneepia nütüma. ²Je tü pütchi tekirajapü'ükat anain pia paala su'upala wayuu wainma, anakaja

pi'itaale joolu'u shia napüleerua na anoujashiikana eekai ne'nnaajünün sünain aa'inraa waneepia tü aluwataanakat anain naya je eekai tütüin süpüla ekirajaa. Anakaja pi'itaale shia napüleerua süpüla nekirajünjatüin wayuu sünain. ³ Anakaja müleka püchecherüle paa'in su'unnaa tü müliaa pi'rakat saaliijee pi'yataain nümüin Jesucristo, maa aka wane surulaat eekai ni'rüin müliaa saaliijee aa'inraa tü aluwataanakat anain nia. ⁴ Wanaa sümaa surulaalün nia, nnojishi aa'inra'ain müin wane kasa naatajatü suulia tü ni'yataainkat, süka naa'inreein tü talatakat atüma naa'in chi nülailashikai. ⁵ Akaajaa wane wayuu ayoujiraai. Müleka naatajatüin nukuaippa sünain niyoujiraain, nnojoleechi awalaajünün mayaainge nukanajün. ⁶ Akaajaa wane wayuu apünajüi, müleka ni'yataale waneepia süka süpüshua naa'in sünain tü pünajütkat, nieechi palajachika sünain aapawaa süpüshi tü a'ttieekat. ⁷ Müleka jülüjale paa'in tü taküjaitpakat pümüin, akaaliijüneechi pia nütüma chi Senyotkai süpüla piyaawatünjatün saa'u.

⁸ Anakaja müleka sotüle paa'in nüchiki chi O'tte'erüikai tü taküjakat waneepia sümüin wayuu noo'opünaa Jesucristo sünain nüso'iraain aa'in süchikijee ouktaa, chi nuu'uliwo'ukai David chi sülaülashikai mma paala sümaiwa. ⁹ Je sünainjee taküjain nüchiki Cristo, te'rashaatain ma'i tamüliala otta püreesain taya atümaa maa aka naa'in wane ka'ruwarai. Mayaainge apüreesajünün taya, nnojoleerü oo'ulaain suulia aküjünaa nünüiki Maleiwa sainküin mmakat

süpüshua. ¹⁰ Tatüjaa aa'una na tawalayuukana sainküin mmakat sünain aneekuushin naya nütüma Maleiwa süpüla o'tte'ennaa sünainjee anoujaa nünain Jesucristo süpüla eenjanain naya nümaa Maleiwa süpüla ka'ikat süpüshua. Je müshijese'e taya, achecherün taa'in su'unnaa süpüshua tü müliaa te'rakat maa'ulu yaa shii'iree nashatein tü takuaippakat süpüla sütsün tü nanoulakat.

¹¹ Anuu wane pütchi shiimüin, müsü mayaa:

Saa'u müin aka ouktakai waya nümaa Cristo, ayateena waya katüin o'u nümaa.

¹² Müleka wachecherüle waa'in sünain anoujaa nünain, aluwataweena waya wanaa nümaa.

Akaajasa müleka japüire waya nüka, japüijeechi nia waka'ya.

¹³ Ja'itasü nnojolün wekeraajün tü nüchekakat wapüleerua, ayateerü naa'inrüin tü nüküjakat achiki paala wamüin süka pansaain nünüiki waneepia.

Achiajaanüshi Timoteo suulia nü'ülüja'alaain

¹⁴ Anakaja müleka püso'irüle naa'in na anoujashii chakana cha'aya sünain tü taküjaitpakat pümüin. Püchiajaa naya nu'upala Maleiwa suulia na'ülüjira'alaajün soo'opünaa pütchi ne'e, tü nnojotkat kasain saamüin namüin. Amalajaweerüle'e sünoula tü wayuu eekai saapün nanüiki sünain a'ülüjirawaa. ¹⁵ Otta piakai, anakaja müleka ayatüle pia sünain pi'yataain nümüin Maleiwa süka süpüshua paa'in,

süpüla “Anashi ma'i” nümüinjachin pümüin. Nnojoleechi pia japülin nu'upala müleka lotüle pukuaiappa sünnain ekirajaa tü shiimüinkat.

¹⁶Anakaja müleka nnojorule kasajatüin pümüin tü pütchi mojusü naashajaakat achiki na wayuu mojtukana atüma Maleiwa, süka shiain no'unüin ma'i alu'u mojtüin Maleiwa natüma süka tü naashajaakat achiki.

¹⁷Je tüü, müsü aka saa'in wane aja'ttaa ata süka sümalaje'ertüin nanoula na wayuukana. Oo'ulaka na'aka na wayuu mojtukana anüiki, eeshi Himeneo oo'ulaka Fileto. ¹⁸Oo'ulaashii naya suulia ekirajaa sünnain tü shiimüinkat süpüla ekirajaa sünnain wane alawaa. Nekirajüin sünnain süso'iraitpain aa'in wayuu naajüin. Je na kapülakana aa'in nanüiki, amalajaasü tü nanoulakat sütüma.

¹⁹Otta tü kapülinajtkat waa'in waya anoujashiikana wapüshua, shia tü shiimüinkat aapünakat wamüin nütüma Maleiwa. Katsüinsü tü wanoulakat süka pansaain nütüiki. Eesüsa'a wane pütchi shiimüin, müsü mayaa: “Na nüpüshikana Maleiwa, e'nnaajünüshii napüshua nütüma”. Otta wane'eya, müsü mayaa: “Chi wayuu aküjakai sümüin wayuu sünnain nünoujain nünain chi Senyotkai, anashi müleka nuu'ulaale suulia kaainjalaa”.

²⁰Sulu'u wane miichi eekai shipiain washinnuu, eesü iita eekai kojutüin ma'i süpüla mi'iraa anasü oo'ulaka eekai jayain süpüla ekiain ne'e miichipa'a. ²¹Chi wayuu eekai niyouktüin tü pütchi nekirajakat anain na ekirajülüikana sünnain alawaa, meechi aka nia saa'in tü iita kojutsükat, süka nukatalaaichipain suulia kaainjalaa süpüla naa'inrüinjatüin kasa anasü sünnain a'yatawaa nümüin Maleiwa.

²²Je meechi aka pia tü iita kojutsükat müleka piyouktüle tü kasa mojusü keejiakat namüin na jima'alii manoujainsaliikana. Shia anaka alu'u müleka kachiiruale paa'in tü nüchekakat püpileerua Maleiwa, maa aka paa'inrüinjachin tü nuluwataakat anain pia, maa aka paa'inmajüinjatüin tü pünoulakat, maa aka alinjatüin wayuu püpüla, je maa aka nnojolinjachin pütkaain sümaa wayuu. Anakaja wanaawajiraale paa'in namaa na anoujashii achuntakana nümüin Maleiwa sünnainjee wulein naa'in. ²³Jalia pia suulia pü'ülüjira'alaajüin sümaa wayuu eekai maa'in saa'in sünnain a'ülüjaa, süka nnojölüin kasain saamüin namüin na anoujashiikana. Pütüjaa aa'ut shia sünnain kalu'uin atkawaa. ²⁴Je saa'u nüchepchiain pia Maleiwa sümaa pütüjain süpileerua ekirajaa wayuu, anakaja müleka kamaneere pia namüin na pikirajakana sümaa nnojölüin pütkaain namaa sünnainjee natüjain pi'rüin. ²⁵⁻²⁶Anasü müleka pime'ejüle naa'in eekai nayouktüin tü pümakat, sümaa anamiain pia namüin. Na kapülakana aa'in tü alawaakat, aa'inreena tü nüchekakat chi Yolujaakai napüleerua. Müleka pime'ejüle naa'in, eeshii süpüla nakaaliijünüinjanain nütüma Maleiwa süpüla su'wanajaainjatüin naa'in süpüla naapaainjatüin tü shiimüinkat pikirajakat anain, süpüla najuittinnünjanain nuulia chi Yolujaakai.

Tü sukuaippainjateetkat wayuu mapeena

3 ¹Anakaja piyaawatüle saa'u jamüinjatüin tü ka'ikat mapeena sülü'ütpa sükalia saja'ttüinjatüin tü kasakat süpüshua. Shiimüin

sünain müliainjatiün ma'li wayuu süpüshua so'u ka'ikat tia. ²Eejeerü wainma wayuu eekai kapülain naa'in nakuaiippa ne'e namüüwa, eekai kachiiruain naa'in tü washirüükat, eekai na'waataain sulu'u nakuaiippa, eekai ne'rüin wayümüin sümüin wayuu, eekai moonooloin sümaa nanüiki nashi je nei, eekai matüjain aapaa analu'ut, je eekai mojutüin Maleiwa natüma. ³Eejeerü wainma wayuu eekai maalin wayuu napüla, eekai mamüliain amüin wayuu, eekai mojuin nanüiki sujuuna wayuu, eekai maa'in naa'in sümaa jashiee, je eekai nayouktüin tü anasükat. ⁴Eejeerü wainma wayuu eekai naa'inreein kasa mojusü, eekai nayouktüin aluwataanaa, eekai yaletayaain nakuaiippa su'upala wayuu, je eekai shaitteenin waneepia saa'u maalin Maleiwa napüla. ⁵Piama akuaippachii naya sükajee nanoujayaain nünain Maleiwa sümaa nnojoliin noonooiin sümaa nünüiki. Jalia pia noulia.

⁶Jalia pia noulia, süka kamaneeyaain naya sümüin wayuu shii'iree kapülain saa'in tü alawaa nekirajakat anain. Ne'ike'erüin wayuu wainma, maa aka na jieyuu jo'uweekana aa'in, na jookana süpüla anoujaa kasa eekai een ne'e süka süchepchiaain naya kaainjalaa. ⁷Ekirajaashii na jieyuukana waneepia sünain kasa jeket. Otta isasü nachiki nayaawatüin saa'u tü shiimüinkat. ⁸Soto paa'in nachiki na ekirajülüikana sünain alawaa kanülüakana Janes oo'ulaka Jambres, na ayouktakana nünüiki Moisés paala sümaiwa. Na wayuu kaainjaraliikana taküjüinapakana achiki pümüin, müshii aka naa'in sünain nayouktüin tü shiimüinkat

süka shiain jülüjüin naa'in tü kasa mojusükat waneepia. Otta ayouktüneena naya mapeena natüma na anoujashiikana, ⁹je süsaleena naya naainjala nütüma Maleiwa, süka shiyaawatüneerüin aa'u sünain maa'awain tü nekirajakat anain, maa aka Janes oo'ulaka Jambres.

Nukuaippainjatkat Timoteo sünain ekirajaa wayuu

¹⁰⁻¹¹Alu'usa piakai, nnojoiishi müin aka na ekirajülüikana sünain alawaa, süka puushikajaain süchiirua takuaiippa waneepia. Pütüjaa aa'ut takuaiippa sünain tekirajüin tü shiimüinkat, sünain taa'inrüin tü kasa anasü tekirajakat anain, sünain kachiiruain taa'in tü nüchekakat Maleiwa tapüleerua, sünain laülaain taa'in sünain anoujaa, je sünain alin tapüla wayuu. Pütüjaa aa'ut takuaiippa sünain tachecherüin taa'in sünain anoujaa sa'akapünaa tü kasa mojusü saa'inrakat wayuu tamüin saaliijee taküjain nüchiki Cristo, maa aka tü müliaa talatirakat cha'aya sulu'u tü pueulokalüirua Antioquía, Iconio oo'ulaka Listra. Akaisa ajuitinnüin taya nütüma chi Senyotkai sa'akapünaa tia müliakat süpüshua. ¹²Soto paa'in wane kasa: Chi wayuu eekai keisalain sümüin nukuaiippa nu'upala Maleiwa, shi'reechi amüin nia wayuu saaliijee nünoujain nünain Jesucristo. ¹³Otta na wayuu e'rüliikana wayümüin oo'ulaka na e'ike'erülüikana wayuu, nnojotsü nountüin ekirajaa sünain tü shiimüinkat süka masütaajuin naya sünain anoujaa tü alawaakat. Koo'omüinsü ma'li waneepia namüin tü ekirajaakat sünain alawaa.

¹⁴Alu'ujasa piakai, anakaja müleka ayatüle pia sünain tü

ekirajünakat anain, tü pünoujakat anain, süka pütüjaain saa'u sünnain shiimüin tü wamakak wayakana na ekirajakana pia. ¹⁵Jintüliwa'aya pia, pütüjaatüjülia aa'u tü ashajuushikat sulu'u tü karaloukta nüchikimaajatkat Maleiwa, tü kekiikat atüma wayuu süpüla o'tte'ennaa sünnainjee anoujaa nünain Jesucristo. ¹⁶Aapünüsü tia pütchikat wamüin waya anoujashiikana wapüshua nütüma chi Naa'inkai Maleiwa süpüla wekirajünjatüin wayuu sünnain. Je na aapaakana shia, achiajaaneena naya sütüma suulia kaainjalaa, anouktüneena akuaippa sütüma, je akaaliijüneena naya sütüma sünnain aa'inraa tü kasa anasükat. ¹⁷Nounteetkalaka naa'inrüin süpüshua tü kasa anasü talatakat atüma naa'in Maleiwa sütüma.

4 ¹Watüjaa aa'uchi Jesucristo sünnain niweetechin nüchikua so'uweena wane ka'i süpüla aluwatawaa saa'u wayuu je süpüla kasalajanaa atüma saainjala wayuu sümüin, wayuu eekai katüin no'u oo'ulaka eekai ouktüin. Sükajee tüü, te'itaain joolu'u püpüleerua wane pütchi nu'upala Maleiwa otta nu'upala Jesucristo: ²Püküja pümata waneepia tü nünüikikat Maleiwa sümüin wayuu. Anakaja ayatüle pia sünnain aküjaa shia, ja'itasü nnojolüin kapülain saa'in tü wayuukolüirua. Püchiajaa eekai kaainjalain. Pümülija eekai mojuin naa'in. Anashi müleka lotüle pukuaippa sünnain ekirajaa sümaa nnojolüin pukulajaain aa'in sünnainjee nnojolüin jaa'a sümüin pümüin.

³So'uweena wane ka'i, shiyoukteerü wayuu wainma tü shiimüinkat ekirajünapü'ukat

anain naya. Eenakeena naya wainma ekirajünnüü eekai alaain süpüla aküjaa namüin wane pütchi keme'eriakat ma'i, tü anakat saa'in namüin süpüla naapajaa.

⁴Nnojoleerü kasajatüin namüin tü shiimüinkat, süka shiaitpain ne'e kapülain naa'in tü aküjalaakat.

⁵Otta piakai, anakaja müleka laülaale paa'in waneepia sümaa püchecherüin paa'in su'utpünaa tü müliaa pi'rakat saaliijee pi'yataain nümüin Jesucristo. Anakaja ayatüle pia sünnain aküjaa nüchiki niakai, chi O'tte'erüikai, sümüin tü manoujainsatkalüirua. Je süpüshua tü aluwataanakat anain pia saa'u aneekuushin pia süpüla a'yatawaa nümüin, paa'inra pümata tia.

⁶Je müshia tayakai, alü'ütsü takalia süpüla to'utünajachin aa'in sütüma wayuu, süpüla amüleerüin tasha atümawaa saa'u takaaliijain wayuu sünnain tü sünnoulakat. ⁷Katsüinsü waneepia taa'in sünnain anoujaa nünain Cristo, maa aka naa'in wane wayuu eekai kalaain süpüla ayamülaa wane ni'ipolo. Je maa aka naa'in wane wayuu ayoujiraai, tekeraajüitpa tü kee'ireekat paala taa'in. Shiimüin sünnain tekeraajüin süpüshua tü tamakat paala nümüin Maleiwa sünnain pansaain tanüiki. ⁸Je so'uweena tü ka'i wasouktüinjatkat o'u nümüin Maleiwa soo'opünaa süpüshua tü kasa waa'inrapü'ukat kataiwa'aya wo'u, awalaajüneechi taya saa'u taa'inrüin waneepia tü kasa anasü nüchekakat tapüleerua. Awalaajüneechi taya nütüma chi Senyotkai Jesucristo, chi lotokoi akuaippa sünnain kasalajanaa atüma saainjala wayuu sümüin. Nnojoleechi tayain ne'e tamüiwa

awalaajünüin. Meena'a napüshua na anoujashiikana a'atapajakana Cristo süna'in niweetüinjachin nüchikua.

Na nütünajutkana Pablo cha'aya Roma

⁹Otta müsia joolu'u, anakaja müleka eewaatile paa'in süpüla püntamaatajachin tanainmüin, ¹⁰süka nu'unajaachipain Demas toulia chamüin Tesalónicamüin süka shiain kachiiruain naa'in tü washirüukat. Je Crescente, tajütüin nia chamüin Galaciamüin. Oo'ulaka Tito, tajütüin nia chamüin Dalmaciamüin. ¹¹Nia ne'e Lucas makataka tamaa. Otta müsia püntajachipa yaamüin, anashi müleka pümaale Marcos tamüin, süka nükaaliijapü'üin taya paalainka süna'in tü a'yatawaakat nümüin Maleiwa. ¹²Otta müshia Tíquico, tajütüichipa nia chaa pünainmüin Éfesomüin. ¹³Otta müshia piakai püntajachipa yaamüin, anakaja müleka püntirüle tamüin tü tashe'in tapütakat cha'aya nipialu'u Carpo chi kepiakai sulu'u tü pueulokat Troas. Je püntira tamüin tü takaralouktase, tü tashajakat alu'u oo'ulaka tü nashajakat alu'u na anoujashiikana paala.

¹⁴Otta chi Alejandrokai anülia, chi kachueerapü'ükai, e'rüipü'ü ma'i wayumüin nia tamüin. Süsaleechipaja'a nia nütüma Maleiwa tü kasa mojusü naa'inrapü'ükat tamüin. ¹⁵Jaliwalaa pia naa'in, süka niyouktüin ma'i waneepia tü wekirajakat anain wayuu.

¹⁶Je wanaa sümaa tasha'wale'ennüin namülatu'u na laülaashiikana sulu'u tü pueulokat Roma, ayüülajünüshi taya so'u ka'ikat tia sütüma tü

tatünajutkalüirua. Nnojoishi taya akaaliijünüin natüma. Kasataalejese nnojoliin süsalain naya tia. ¹⁷Otta chi Senyotkai, nnojoishi niyüülajüin taya. Katsüinsü taa'in nütüma je tountüin taküjain nüchiki niakai, chi O'tte'erüikai, namüin napüshua na laülaashii gentilekana. Aa'inmajünüshi taya nütüma suulia to'utinnajachin aa'in so'u tia. ¹⁸Je joolu'u, tatüjaa aa'uchi chi Senyotkai süna'in nujuittireechin taya sa'akajee wayuu eekai shi'rülüin wayumüin tamüin, süpüla nüntirüinjachin taya chamüin iipünaamüin eere nuluwataain. Kasataalejese kojütüin nia sütüma wayuu wainma maa'ulu yaa je süpüla ka'ikat süpüshua. Amén.

Asaküshi Pablo

¹⁹“Asakitshi pünain”, pümawalai sümüin Priscila je nümüin Aquila chi su'wayuusekai oo'ulaka namüin na nüpüshikanairua Onesiforo. ²⁰Otta müshia chi Erastokai anülia, makatüshi nia cha'aya sulu'u tü pueulokat Corinto. Je chi Trófimokai anülia, tapütüin nia cha'aya sulu'u tü pueulokat Mileto süka ayuulin nia. ²¹Otta piakai, anakaja müleka eewaatile paa'in süpüla püntamaatajachin tanainmüin süpülapünaa juyapuulin mmakat süka aijeerüin tü jemiaikat. Je joolu'u yaajee yaa, asakitshii pünain Eubulo, Pudente, Lino je Claudia. Je asakitshii pünain na wawalayuukana napishua yaakana.

²²Shiataaja'a ne'e tü tashajüinjatkat pümüin. Tatüjaa aa'uchi chi Senyotkai süna'in eenjachin nia pümaa waneepia je süna'in nii'iyatüinjattüin na'anasia waneepia pümüin.